



Batka prijavili pacijenti

Uhapšeni Almir Čehajić osumnjičen je da je protivpravno stekao 625.427,20 KM

Piše: **AMELA LONČARIĆ**

Pripadnici **SIPA** uhapsili su jučer Almira Čehajića Batka, poznato TV lice, glumca, humanitarca i predsjednika nevladine organizacije Otvorena mreža, zbog sumnje da je stekao protivpravnu imovinsku korist od 625.427,20 KM. Portparol **SIPA** Luka Miladinović potvrdio je za Oslobođenje da je uhapšeno jedno lice i da su izvršeni pretresi na četiri lokacije u Kantonu Sarajevo.

- Pretresi su izvršeni zbog postojanja osnovane sumnje da su

osumnjičena lica počinila krivična djela zloupotreba položaja ili ovlaštenja i pranje novca, kaže Miladinović.

Oslobođenje saznaje da se krivična djela odnose na prikupljanje novca za transplantaciju organa pacijenata iz BiH u inostranstvu. Čehajić je osumnjičen i za podizanje i raspolaganje kreditima na teret pravnog lica City - Otvorena mreža, na štetu te firme. / STR. 5.

Nezakonito pribavio pola miliona maraka

Pripadnici Državne agencije za istrage i zaštitu uhapsili su jučer Almira Čehajića Batka zbog sumnje na zloupotrebu položaja ili ovlaštenja i pranje novca

Pripadnici **Državne agencije za istrage i zaštitu (SIPA)** uhapsili su jučer Almira Čehajića Batka, glumca i poznato televizijsko lice koji je ujedno i predsjednik nevladine organizacije Otvorena mreža, koja se bavi humanitarnim radom. Akcija kodnog naziva Network i pretresi izvršeni su po naredbi Kantonalnog suda u Sarajevu, a aktivnosti se provode pod nadzorom i uputama Tužilaštva Kantona Sarajevo.


Kreditna sredstva

Luka Miladinović, portparol **SIPA**, potvrdio je za Oslobođenje da su pretresi izvršeni na četiri lokacije u Kantonu Sarajevo, a pretreseni su poslovni i stambeni objekti i pokretne stvari.

Cehajić kaže da se radi o prijavi pacijenata koji su u programu Otvorene mreže za kadaverične transplantacije

- Jedno lice je do sada lišeno slobode. Pretresi su izvršeni zbog postojanja osnovane sumnje da su osumnjičena lica počinila krivična djela zloupotreba položaja ili ovlaštenja i pranje novca, rekao nam je Miladinović.

Oslobođenje iz dobro obaviještenog izvora saznaje da se počinjenje krivičnih djela odnosi na aktivnosti prikupljanja novčanih sredstava u svrhu liječenja, odnosno transplantacije organa pacijenata iz Bosne i Hercegovine u inostranstvu, kao i okolnosti podizanja i raspolaganja kreditnim sredstvima na teret



Osim Čehajića, osumnjičena je još jedna osoba / SENAD GUBELIĆ

pravnog lica City - Otvorena mreža d.o.o. Sarajevo, a u korist uhapšenog, čime je navedenom pravnom licu prouzrokovana šteta.

Na ovaj način osumnjičeni Čehajić je pribavio protivpravnu imovinsku korist od najmanje 625.427,20 maraka. Također, Oslobođenje nezvanično saznaje da je osim Čehajića osumnjičeno još jedno lice, koje je trenutno nedostupno organima gonjenja i nalazi se van naše zemlje.

- Imam potvrdu da su pripadnici **SIPA** slobode lišili jednu osobu inicijala A. Č, zbog krivičnog djela zloupotreba položaja ili ovlaštenja i pranje novca. Nakon kriminalističke obrade u **Državnoj agenciji**

za istrage i zaštitu osumnjičeni će biti predat u nadležnost Tužilaštva na daljnje postupanje, izjavila je za Oslobođenje Azra Bavčić, portparolka Tužilaštva KS-a.

Sve će biti dobro

Inače, jučer se oglasio i sam Čehajić i potvrdio da su u ranim jutarnjim satima pripadnici **SIPA** izuzeli određenu dokumentaciju iz službenih prostorija. Kako je naveo, radi o se prijavi pacijenata koji su u programu Otvorene mreže za kadaverične transplantacije. Čehajić je istakao "kako je siguran da će se sve izvršiti pozitivno, kako za organizaciju, tako i za sve pacijente".

AMELA LONČARIĆ